

## PIELI KALATA'N M'Ọ TỌ SỤ NNYUAN'N

### *M'ọ wọ nun'n*

Pielì hẹlẹlì kalata ẹhì nwanlìn bẹ kwalaa mọ b'a fa bẹ nwun b'a man Zozi Kilisi'n. Anun ọ lẹ kan kele bẹ ke ọ si ke ọ ngọ hye man, ọ 'ba wu. Ẹhika ati, ọ kulo ke ọ kacì bẹ ninngẹ'n-mọ m'ọ hehelelì'n. Alimọva kalata'n mọ Pielì hẹlẹlì nùn anun, ọ lẹ kan kele asọnùn mma'n-mọ ke sẹ m̄n'n lẹ kele bẹ ahulowa a, bẹ tìla bẹ dedi nùn anun kpọlo. Kalata'n m'ọ tọ sụ nnyuan ẹhì anun, ọ lẹ kan kele bẹ ke sẹ ato ngehelefọe-mọ fite asọnùn nùn anun nán bẹ lẹ kekele ato ninngẹ bẹ sẹcì yí a, bẹ só ananhọle ẹjọle'n mọ bẹ tìlì nùn anun kpa.

Kalata nùn ati 1.1-15, Pielì lẹ kan like ati m'ọ man ọ lẹ kele yí kalata'n: ọ 'kacì asọnùn mma'n-mọ maan bẹ ti tanlan wawe nùn ẹjọle'n mọ bẹ hanlìn hẹlẹlì bẹ nùn asụ. Alimọva ẹkacìe di'e'n (1.16-21) tọ de Zozi Kilisi anwun Ẹjọlekpa'n. Ẹjọlekpa sọ'n, yí Pielì muonun nùn mmọfọe'n-mọ di yí nwun adanzìe ke ọ tì ananhọle. Nyanmian mgbọmanfọe'n-mọ mọ Wawe Nwanzan-nwanzan'n hyunlìn bẹ maan bẹ hẹlẹlì Ẹhele Ẹjọle Nwanzan-nwanzan'n kusu di yí nwun adanzìe. Kalata nùn ati nnyuan nùn anun, Pielì lẹ bọ ato ngehelefọe'n-mọ nyọlìe'n-mọ bẹ fa bẹ sẹcì asọnùn'n tetele nùn. Ẹkannzọe mọ Zudì kannzọlì ato ngehelefọe'n-mọ yí kalata nùn anun'n, yí kọnmgba nùn ala bọbọ yê ye nwun yí Pielì kusu kalata nùn anun ọ. Kalata nùn ati nsan nùn anun, Pielì lẹ bua bẹ mọ bẹ nwan yé Mùn Zozi ngọ sa ngọ a man ọ ngọ bua man m̄n'n nde'e'n. Ọ lẹ kacì bẹ ke

se Kilisi a hye nán ɔ wali man an, anun be nwún yí ke Nyanmian a si abutale. Ɔ sanlɔn ke Nyanmian ngulo man ke sɔanlan fíi minlin, nan ɔ kulo ke bé kwalaa be kaci bé asitanlan'n be fi bé ete nin anun be jasɔ (3.9). Kalata nin agualie nun, Pielɔ kulo ke asonun mma'n-mɔ mian bé bu be tanlan anwɔntie nun nán Nyanmian a nnyan man bé nwɔn ejɔle ete ɔ'a ngan man mɛle mɔ Kilisi 'sa ba'n (3.11-18).

### *Ahin ebisa*

<sup>1</sup> Mɔn, Simɔn Pielɔ, mɔ n di Zozi Kilisi akɔa ese n di yí bɔfɔe'n yê mun kele kalata ehi ɔ. Mun kele mun nwan emɔ kwalaa mɔ emɔ le dedi kɔnmgba'n mɔ ye le yí mɔ yí nwɔn cian'n. Zozi Kilisi m'ɔ ti yé Nyanmian m'ɔ ti yé Ngɔandefɔe nin adawɔlɔman, y'a nyan dedi sɔ'n ɔ sanlɔn ke ɔ ti sese. <sup>2</sup> Mun 'bisa emɔ ahin. Nyanmian nun yé Mun Zozi, be nwún emɔ anwɔn anwunnvoe, ese bé man emɔ alba cíci bé nwɔn kpa. Be mán emɔ sí bé kpa.

<sup>3</sup> Zozi Kilisi mɔ Nyanmian tunmin'n wɔ yí nun'n, ɔ'a fa yí kwalaa m'ɔ cian'n ɔ'a man yé maan ye bu amanmuo m'ɔ sɔ Nyanmian anyɔn. Ɔ'a man y'a si Nyanmian m'ɔ feleli yé ke ye yó kpa ke yí muonun ese ye wólv yí anunminnyanmɔn nin anun'n. <sup>4</sup> Yí ti, ninnge mgbakpa'n-mɔ m'ɔ falɔ bɔli yé anɔhɔba'n, ɔ'a man yé sa a han bé. Ninnge sɔ'n-mɔ dunman nun, emɔ kwalaa be nwanndi mân ehi anun anyɔnbɔlv ninnge ete'n m'ɔ man ewue'n nán emɔ nun Nyanmian be yɔ kɔn.

<sup>5</sup> Ehika ati, emɔ bó mɔndɔnlɔn be bó bala kpa be tú bé dedi nin asɔ. Emɔ nwún ngele be tú bé abalabɔ kpa nin asɔ. <sup>6</sup> Esee emɔ bó mɔndɔnlɔn be sɔ bé nwɔn be tú ngele nin asɔ. Emɔ sí abutale be tú bé nwɔn esɔ

nun asu. Emò fá bé nwòn be bó Nyanmian. <sup>7</sup> Emò anwòn ebò mò b'a fa b'a bò Nyanmian'n, emò húlo anianman'n-mò be bóka sù. Emò húlo menian'n-mò kwalaaatin be tó anianman'n-mò ehulo nun asu. <sup>8</sup> Ninngé m'ò di ké emò nyan yí bé asitanlan nun anun nun anin. Se emò nyan yí dòn an, ò 'man emò di junman'n kanlanman kpa ese be 'sì yé Mìn Zozi Kilisi be kò bé nyunnun. <sup>9</sup> Nan svanlan mò ninngé sò'n-mò nnòn man yí nun'n, anin ò ti ké anyinsinlinwafùe anaan ò ti ké svanlan m'ò nnwun man mva. Ò ti svanlan mò yí lva a fi ké yí ete'n m'ò yòli yí daba'n, Nyanmian a fa a hye yí. <sup>10</sup> Yí sò ati, efelè'n mò Nyanmian a fèlè emò ese ò'a fa emò'n, emò bó m̀̀ndinlìn be jínlan nun cinnjìn kpa. Ò sanlìn ké se emò yò yí sò a, emò ngò tò man ete nun lé. <sup>11</sup> Ebele nun anun yê Nyanmian 'tike yé Mìn Zozi Kilisi m'ò ti yé Ngvandefùe'n Belemgbìn Mân'n m'ò mgbe man nun lé nun anvan'n maan emò wùlù nun ò.

<sup>12</sup> Ehika ati, cian biala mìn 'kacì emò ninngé sò'n-mò kemò afi emò sì bé daba'n maan ananhòle ejòle'n mò emò tili'n fòtò emò kpa. <sup>13</sup> Kemò n de ti asì'n, mìn de mìn di ké ò ti kpa ké n gáci emò ninngé sò'n-mò nán emò alva a nvi man bé nwòn. <sup>14</sup> Afì mìn sì ké ò ngò hye man, m 'ba wu ké yé Mìn Zozi Kilisi hanlìn heleli mìn'n. <sup>15</sup> Nan kemò n wuli man'n, mìn 'bò m̀̀ndinlìn mìn kéle kalata sò'n-mò mìn sie emò. Yí dié se mìn wu a, anin emò alva nvi man ejòle sò'n-mò.

### *Zozi Kilisi anunminnyanm̀̀n'n*

<sup>16</sup> Ehì, yé Mìn Zozi Kilisi tunmin m'ò le yí ò nòn yí ewale nun anwòn ejòle yê ye hanlìn ye heleli emò ò. Nán ejòle mò menian'n-mò bò bé ti anun be kan'n yê ye hanlìn ò. Nan ye nwunlin yí anunminnyanm̀̀n'n

kpili'n yé nyinsu. <sup>17</sup> Mɛlɛ mɔ Nyanmian m'ɔ ti Siɛ'n 'man yí asasvɛ ɔ wula yí anunminnyanmɔn'n, anin yɛ wɔ ɛbɛlɛ. Yí anunminnyanmɔn kpili nɔn anun, Nyanmian kɔ man bɛ kɔ ti yí nɔn'n. Yí nwan: “Mín ehulo Baa y'ɔ le sɔanlan ɛhi. M'an fa mín lɔa'n kɔalaa m'an wula yí nun.” <sup>18</sup> Mɛlɛ mɔ anin yɛ nɔn yí wɔ buka nwannzan-nwannzan nɔn asu ɛɔ'n, yé bɔbɔ muonun yɛ tɔli anɛ sɔ'n m'ɔ fi nyanmiansɔ'n.

<sup>19</sup> Yí sɔ ati, yɛ de ɛjɔlɛ'n mɔ Nyanmian mgbɔmanfvɛ'n-mɔ hanlɔn'n yɛ di kpa. ɔ fata kɛ ɛmɔ yɔ anzvɛ bɛ tie ɛjɔlɛ sɔ'n kpa. ɔ sanlɔn kɛ ɛjɔlɛ sɔ'n-mɔ ti kɛ kanlannɛ m'ɔ lɛ ta awosin nun ɔ. ɔ 'ta dede alibahian nzalama'n fite nán alɛ nɔn a hɔn. Zozi Kilisi m'ɔ ti kɛ alibahian nzalama sɔ'n 'ta ɛmɔ ahɔnlɔn'n-mɔ anun. <sup>20</sup> Yí bɛ-yue-asɛ, ɛmɔ nwún yí kɛ, ɛjɔlɛ'n mɔ Nyanmian mgbɔmanfvɛ'n-mɔ hanlɔn, m'ɔ wɔ ɛhɛlɛ ɛjɔlɛ nɔn anun'n, nán bɛ ngɔnmɔn bɛ ti anun yê bɛ bɔli bɛ hanlɔn ɔ. <sup>21</sup> ɔ sanlɔn kɛ ɛjɔlɛ mɔ Nyanmian kɔ fiti nun ɔ kɔ hele'n, ɔ ti man like mɔ sɔanlan muonun kɔala kɛ ɔ bɔ yí ti anun ɔ kan ɔ. Nan Wawɛ Nwannzan-nwannzan'n m'ɔ wɔ mgbɔmanfvɛ'n-mɔ anun'n y'ɔ man bɛ jɔjɔli Nyanmian anɔan ɔ.

## 2

### *Ato ngehelefvɛ'n-mɔ*

<sup>1</sup> ɛhi, daba anin ato mgbɔmanfvɛ-mɔ wɔ Nyanmian menian'n-mɔ anun. Ato ngehelefvɛ-mɔ kɔsu 'ba fite fite ɛmɔ afian. Bɛ 'ba hehele ato ninngɛ nɔvialɛ nɔn bɛ sɛci asɔnɔn'n. Menian sɔ'n-mɔ mɔ yé Mɔn a le bɛ ti fi bɛ ɛtɛ nɔn anun'n, b'a kaci bɛ nzin b'a si yí. Bɛ nyɔliɛ sɔ'n 'ba man bɛ wu nvu nun. <sup>2</sup> Menian dɔɔn 'ba fa bɛ atɔn ɛtɛ nɔn asu

yê bé nyɔliε εte'n dunman nun, menian'n-mɔ 'ba han Nyanmian ananhɔle atin nun anwɔn ejɔle εte. <sup>3</sup> Esika anyɔnbɔlɔ'n dunman nun, ato ngehelefoε sɔ'n-mɔ 'ba bɔ εmɔ apoo be didi εmɔ anwɔn. Nan Nyanmian m'ɔ bua ndεε nun a fa bé nwɔn ajɔnlɔn dada angɔnmɔn. ɔ ngɔ hyε man fíí ɔ 'ba bɔ bé bɔsɔ.

<sup>4</sup> Afí nyanmiansɔ mmɔfoε'n-mɔ mɔ be yɔli εte'n, Nyanmian Kpili a nva man bé nwɔn sa a nje man bé. Nán ɔ'a hyɔ bé ɔ'a gua bɔnza kpili nun anun, lika m'ɔ ti awosin'n. Be wɔ εbele dede ɔ 'bua bé ndεε. <sup>5</sup> Nyanmian a nyaci man daba daba menian'n-mɔ anwɔn sa ɔ'a nje man bé. ɔ manlɔn esue kpili tɔli dede ɔ nɔanlɔn menian ati anun εte'n-mɔ mɔ anɔn be wɔ mán sɔ nun anun'n. Bian'n mɔ be fele yí Nowe mɔ anɔn ɔ tu menian'n-mɔ fɔɔ ke be bó bala kpa'n, ɔ nɔn menian nɔsɔ ala yê Nyanmian Kpili leli bé ngɔan ɔ. <sup>6</sup> Nyanmian Kpili bɔli Sodɔmɔn nɔn Gomɔɔ kulo'n-mɔ abɔsɔ. ɔ tɔli bé nun sɔn dede be tɔli nzɔan. ɔ'a yɔ bé sɔ maan be nwun yí ke menian mɔ bé nyɔn nzɔ man yí'n, ke bé ayueliε'n yue yí nun anɔn. <sup>7</sup> Mele sɔ'n, Lɔtɔ m'ɔ ti sɔanlan kpa, m'ɔ di menian'n-mɔ εte'n mɔ be yɔ nun anwɔn yale'n, Nyanmian Kpili leli yí ngɔan. <sup>8</sup> Anɔn sεsefoε sɔ'n ti εtefoε'n-mɔ afian. Etefoε sɔ'n-mɔ nyɔliε'n mɔ be yɔ yí cian daa m'ɔ ti εte ɔ nwun yí'n, ɔ man ɔ di yale. <sup>9</sup> Ehika ati, yé Mɔn sɔ atin mɔ ɔ 'bu sɔ ɔ de bé mɔ b'a fa bé nwɔn b'a bɔ yí'n fi emian nun anun. Nan εtefoε'n-mɔ die, mɔ Nyanmian a fa a sie bé'n y'ɔ le ndεε ebua'n mɔ ɔ 'bua bé ndεε ebua cian nun anun'n. <sup>10</sup> Menian mɔ be mmu man Nyanmian Kpili tunmin'n like fíí mɔ ninngε εte mɔ anwɔnnaan'n kulo'n yê cian daa be y'ɔ'n, bé yê Nyanmian 'tua bé kale nun ɔ.

Ato ngehelefue sɔ'n-mɔ mɔ n ganlɪn bɛ ejɔle'n, be nzulo man sɔanlan fɪi, ese be tu bɛ nwɔn. Bɛ nyɪn nzɔ man nyanmiansɔ mmɔfue'n-mɔ mɔ be le anunminnyanmɔn'n, nan be kan bɛ nwɔn ejɔle ete. <sup>11</sup> Kusɔ nyanmiansɔ mmɔfue'n-mɔ muonun mɔ be le anwɔnsele kpa ɔ nɔn tunmin be tala ato ngehelefue sɔ'n-mɔ'n, be ngan man ejɔle ete be ndia man bɛ wɔ Nyanmian anyunnun. <sup>12</sup> Nan menian sɔ'n-mɔ nzi man ngele fɪi. Be yɔ bɛ ninnge'n-mɔ ke ebolo naan. Mɔ bɛ ti'n kɔ se bɛ'n yɛ be yɔ ɔ. Bɛ ehyie nɔn bɛ ehuan ati yɛ be bɔli bɛ ɔ. Menian sɔ'n-mɔ kan like mɔ be nzi man yɪ nɪn anwɔn ejɔle ete. Be 'wu sakpa ke ebolo naan'n-mɔ wu yɪ'n. <sup>13</sup> Yalɛ'n mɔ be kele menian'n-mɔ'n, Nyanmian Kpili 'ba hele bɛ bie. Eyua sɔ kpa yɛ be yɔ bɛ ninnge ete'n-mɔ ɔ. Se emɔ le di enyɪnmian nɔn be ba emɔ afian an, bɛ abalabɔ ete'n gua emɔ anyunnun asi. Ese be di apoo'n mɔ be bɔ emɔ nɪn anwɔn fe. <sup>14</sup> Balasua ejɔle yɛ ɔ wɔ bɛ ajɔnlɪn nɪn ɔ. Cian daa be yɔ ete'n be kɔ bɛ nyunnun. Be laka menian'n-mɔ mɔ Nyanmian Anɔan Ejɔle'n tɪli man bɛ'n maan be gua kunman nɪn. Esika anyɪnbɔlɔ y'ɔ la bɛ nwɔn ɔ. Menian sɔ'n-mɔ a fa munnzue. <sup>15</sup> Be fi ananhɔle atɪn nɪn asɔ b'a jasɔ. B'a minlɪn b'a fa Bozɔɔ awa Balamɔn m'ɔ kulo esika nɪn atɪn die nɪn asɔ. Balamɔn sɔ'n, esika nɪn anyɪnbɔlɔ dunman nɪn, ɔ yɔli nyɔlie ete. <sup>16</sup> Nan cian kɔn Nyanmian tuli yɪ nyunnun wɔ yɪ anzɔsele nɪn anwɔn. Afi afunlunmun'n mɔ anɪn ɔ ti sɔ'n, ɔ ti naan m'ɔ njɔɔ man. Afunlunmun'n kɔ jɔɔ ke kulo sɔanlan jɔɔ'n ɔ kɔ tua kpɔmanfue sɔ nɪn atɪn wɔ yɪ nyɔlie ete nɪn anwɔn.

<sup>17</sup> Menian sɔ'n-mɔ ti ke asue mɔ ɔ'a sɪsan ɔ. Be ti ke esue mɔ ɔ'a munlan mɔ anwɔnman'n nɔn yɪ a

hɔ ɔ. Nyanmian Kpili a sesie bé lika awosin bibaa kpa nun anun. <sup>18</sup> Bε kolo bé nwan nun mgban. Bε sua bé mɔ kikaala bε fi εtefve'n-mɔ asa nun b'a foti'n ngaa bε man bε nian bé nyɔliε εte'n-mɔ asu maan bε gua kunman nun biekun. <sup>19</sup> Bε kan bε kele bé kε bε 'ba nyan fanwɔndi, nan kusɔ anin bé muonun bε ti εte'n m'ɔ fa bε kɔ ewue nun'n nganga. ɔ sanlɪn kε like m'ɔ sie swanlan'n man swanlan sɔ'n kaci yí kanga. <sup>20</sup> Afi menian mɔ bε kɔ sɪ yé Mɪn yé Defve Zozi Kilisi, mɔ bε kɔ ti bé nwɔn fi mân nun anun ninngε nvuin nvuin'n-mɔ anwɔn'n, sε bε sa bé nzin ninngε sɔ'n-mɔ anwɔn biekun an, bε etolo mɔ bε kɔ tolo'n, anin daba diε'n ti kpa. <sup>21</sup> ɔ ti kpa man menian sɔ'n-mɔ kε ahan b'a nwun man Nyanmian atɪn'n, ɔ tala kε bε kɔ nwun yí nán b'a ju yí mala nwannzan-nwannzan'n m'ɔ kɔ hele bé'n b'a tɔ'n. <sup>22</sup> Mɔ ɔ'a tɔ bé'n, ɔ kele kε anyɪndala'n mɔ menian'n-mɔ bu'n ti ananhɔle. Bé nwan: “Cɔa nun a sa yí nzin ɔ'a li like'n m'ɔ kpuli'n,” εsε “Kpolike'n mɔ b'a bia yí'n, ɔ'a sa ɔ'a kunndo yí nwɔn asâ nun anun biekun.”

### 3

#### *Yé Mɪn εwale'n*

<sup>1</sup> Ehulo mma, ε 'nwun kalata'n m'ɔ tian yí nnyuan'n mɔ mɪn kele mɪn bele εmɔ'n. Kalata nnyuan sɔ'n kwalaa anun, mɪn kaci εmɔ ninngε mɔ εmɔ sɪ yí daba'n mɪn man εmɔ ati tanlan sɔ kpa. <sup>2</sup> Mɪn kulo kε εmɔ ati kaci εjɔle'n mɔ Nyanmian mgbɔmanfve kɔnɔn-ngɔnɔn'n-mɔ hanlɪn yí daba'n. Εsε mɪn kulo kε εmɔ ati kaci yé Mɪn yé Defve'n mala'n mɔ εmɔ mmɔfve'n-mɔ sunlɪn εmɔ εɔ bε heheleli εmɔ'n.

<sup>3</sup> Mín ejòlè'n m'ò li mva'n y'ò le kε, emò nwún yí kε mèlε kasian nún anun, menian mmie-mò 'ba fite fite. Menian sò'n-mò 'ba yò nyòlε ετε'n mò bé muonun bé kunnun kulo'n. Bε 'ba gòlò emò anwòn <sup>4</sup>bε kan kε: “Asò Zozi a mmò man anòhòba kε ò 'ba ò? Nan ò wò nin? Ò sanlín kε, kε yé nan-mò wuli dada angònmin dede m'ò ju ene'n, ninngè'n kwalaa mò Nyanmian bòl'n, fí kacili man!” <sup>5</sup> Menian sò'n-mò, bε man bé lva fi bé nwòn kε daba daba, Nyanmian Kpili le yí Nòan Ejòlè'n y'ò bòlì anwunno nòn asì ò. Ò man asìe'n fi nzue nún fiteli, nan ò'a tì asìe'n fi nzue nún anwòn. <sup>6</sup> Eεε Nyanmian kpili le nzue y'ò falì seculì daba mân nún ò. Mân'n kwalaa nòanlín. <sup>7</sup> Nan anwunno nòn asìe'n mò bε wò εwa ene'n, Nyanmian Anòan Ejòlε kònmgba sò nún a fa bé a sie dede ò 'ju cian mò ò 'tò bé nún sìn. Ò'a fa bé ò'a sie dede ò 'ju cian mò ò 'bua mân'n ndεε ò kun εtefòe'n-mò.

<sup>8</sup> Ehulo mma, ejòlε kòn ehì, nán bε man bé lva fi. Ejòlε sò'n y'ò le kε yé Mún anyunnun, cian kòn tì kε afòε akpu, yê “afòε akpu tì yí nyunnun cian kòn.” <sup>9</sup> Menian'n mmie-mò jònlín kε like'n mò yé Mún nwan ò 'yò'n, ò'a hyε yí nwòn sònman. Nán yí sò ò, nán ò'a si abòtalε emò dunman nún. Ò sanlín kε ò ngulo man kε emò nunhan bie fí minlín, nan ò kulo kε bé kwalaa bε fi bé εte nún anun bε jasò. <sup>10</sup> Nan kòsò yé Mún εwale cian'n, ò 'fu yé nún kε awofòε. Cian sò'n, nyanmian'n 'ba han nún, ò 'man menian'n-mò anwòn wòsò bé nán yí bòsò a nunnun. Sìn 'ba jue yala anwunno εlò ninngè'n-mò. Asìe'n nòn sò ninngè'n kwalaa abòsò 'ba bò.

<sup>11</sup> Sε ninngè'n-mò kwalaa ayueli'e'n tì sva a, anún emò nían bé nwòn kpa wò bé abalabò nún anun. Ò



di ke emə enannɔɔ'ni yə nwanzzan-nwanzzan m'ə keke ke emə a fa bé nwɔn b'a bə Nyanmian. <sup>12</sup> Emə tánlan be nwónnde Nyanmian Kpili ewale cian'n, nán emə bə mɔndɔnlɔn be yə like mə be yə a, cian sɔ'n kə ju nde'n. Cian sɔ'n, sɔn'n 'yala anwunno elə ninng'e'n-mə ə bə bé busu bəkəə! <sup>13</sup> Nan yé die, ye le nwónnde anwunno fufəle'n, nɔn asie fufəle'n m'ə ti sesefo'e'n-mə lika mə Nyanmian Kpili a fa a bə yé anəhuba'n.

<sup>14</sup> Ehi ati, ehulo mma, kemə emə le nwónnde yé Min ewale'n, emə bə mɔndɔnlɔn be bə bala kpa. Yí die, cian m'ə kə a'n, be nnyan man emə anwɔn ejəle ete fíi be ngan man wə yí nyunnun, nán emə a tanlan wə alvacicie nun. <sup>15</sup> Emə nwún yí ke abutale'n mə yé Min le si'n, menian'n-mə ngwan ele ti ə. Ejəle sɔ'n yé Pəlu m'ə ti yé nianman kpa'n le ngele'n mə Nyanmian manlɔn yí'n ə heleli beleli emə nɔn ə. <sup>16</sup> Yí kalata'n-mə kwalaa m'ə kə hele nɔn anun, ə kan ejəle sɔ'n. Yí kalata'n-mə anun, ejəle kpəle kpəle mmie-mə wə nun, bé bu etie yə si kpa. Menian mə be nzi man like fíi mə bé dedi'n nza man bé'n, be kaci kaci ejəle sɔ'n-mə. Nyanmian Anwan Ejəle bu nga'n, ke be kaci kaci yí hə. Bé muonun be le yə bé nwɔn.

<sup>17</sup> Nan emə die, ehulo mma, b'a kaci emə. Emə nían bé nwɔn kpa, nán bé mə be kpə Nyanmian nɔn a nnaka man emə maan emə a minlin man bé jinlanbele kpa'n. <sup>18</sup> Nan emə bə mɔndɔnlɔn be tánlan yé Min Zozi m'ə ti yé Ngwandefəle nɔn anwunnvoe enwuan'n nɔn yí esie nɔn anun be hə bé nyunnun. Anunminnyanmɔn hán yí ene, ə nɔn mele daa! Amin.

**Nyɥhyɛ Fɔfɔlɛ'n**  
**Anyin: Nyɥhyɛ Fɔfɔlɛ'n New Testament**

copyright © 1997 Wycliffe Bible Translators, Inc.

Language: Agni Sanvi

Contributor: Wycliffe Bible Translators, Inc.

All rights reserved.

2024-02-11

---

PDF generated using Haiola and XeLaTeX on 21 Feb 2024 from source files  
dated 29 Jan 2022

b4bf56fc-6e3d-5a7c-9f55-25d2c3645a88